



NEGERI JOHOR

# Warta Kerajaan

DITERBITKAN DENGAN KUASA

*GOVERNMENT OF JOHORE GAZETTE*

*PUBLISHED BY AUTHORITY*

---

---

## MAJLIS DAERAH SIMPANG RENGAM 2011

---

---

### AKTA KERAJAAN TEMPATAN, 1976

### UNDANG-UNDANG KECIL MENCEGAH KEKOTORAN

### (MAJLIS DAERAH SIMPANG RENGAM) 2011

PADA menjalankan kuasa-kuasa yang diberikan oleh seksyen 73 dan seksyen 102 Akta Kerajaan Tempatan, 1976 Majlis Daerah Simpang Renggam membuat, dan menurut seksyen 103 Akta tersebut, Pihak Berkuasa Negeri mengesahkan undang-undang kecil berikut –

#### **Nama dan mula berkuat kuasa**

1. Undang-undang kecil ini bolehlah dinamakan **Undang-undang Kecil Mencegah Kekotoran (Majlis Daerah Simpang Renggam) 2011** dan hendaklah dipakai hanya bagi kawasan Majlis tersebut dan hendaklah disifatkan telah mula berkuat kuasa pada tarikh ia diwartakan.

#### **Tafsiran**

2. Dalam Undang-undang Kecil ini, melainkan jika kandungan ayatnya menghendaki makna yang lain -

“bangunan” termasuklah sebuah rumah, pondok, bangsal atau kepungan beratap, sama ada digunakan bagi maksud kediaman manusia atau selainnya dan juga sesuatu tembok, pagar, pelantar, tangki najis, tangki bawah tanah, pementasan, pintu pagar, tiang, pilar pagar pancang, bingkai, papan dinding, pelancar, limbungan, dermaga, jeti, pelantar pendaratan, kolam renang, jambatan, landasan kereta api, talian penghantaran kabel, talian penyiaran, talian paip atas atau struktur lain tumpangan atau asal;

“halangan” ertinya sekatan semua atau sebahagian daripada jalan atau tempat awam yang menyebabkan kesusahan yang tidak munasabah kepada orang ramai;

“kekotoran” termasuklah mana-mana habuk, pasir tanah, tanah merah, batu kelikir, tanah liat, batu, kertas, abu, bangkai, sampah-sarap, daun dan ranting, rumput, jerami, kotak, tong, bendera, cukuran, rambut, bulu, habuk gergaji, sampah-sarap kebun, sampah-sarap kandang, sampah-sarap perniagaan, baja, sampah, botol, kaca, tin, bekas makanan, pembalut makanan, sisa-sisa makanan atau benda-benda lain atau barang-barang lain.

“kenderaan” termasuklah mana-mana kenderaan sama ada digerakkan dengan jentera atau selainnya

“lebu” termasuklah suatu jalan, medan, siar kaki, jambatan atas, lorong belakang, jalan laluan atau jalan susur, sama ada jalan tembus atau tidak, di mana orang ramai mempunyai hak lalu, dan juga jalan di atas sesuatu jambatan, dan juga termasuklah sesuatu jalan, siar kaki atau laluan, halaman terbuka atau jalan kecil terbuka yang digunakan untuk dicadangkan untuk digunakan sebagai suatu jalan masuk kepada dua buah pegangan atau lebih, sama ada orang ramai mempunyai hak lalu di atasnya atau tidak tepi jalan, bahu jalan, dan semua saluran, parit dan longkang di tepi mana-mana lebu hendaklah disifatkan sebagai sebahagian daripada lebu itu.

“Majlis” ertinya Majlis Daerah Simpang Renggam

“pasar” termasuklah mana-mana tempat awam yang biasanya digunakan untuk menjual binatang, atau daging, ikan, buah-buahan sayur-sayuran atau lain bahan-bahan

makanan yang mudah busuk untuk kegunaan manusia dan untuk menjual atau berbagai jenis kain-kain, dan termasuklah semua tanah dan premis yang digunakan dengan apa cara sekalipun untuk tujuan tersebut atau yang berkaitan dengannya;

“pasar awam” ertinya sebuah pasar yang dipunyai, disewakan atau diselenggarakan oleh Yang Dipertua;

“pegawai kesihatan” ertinya pegawai yang pada masa itu menjalankan tugas seorang pegawai kesihatan, Majlis Daerah Simpang Renggam;

“penghuni” ertinya orang yang menduduki mana-mana premis atau menjaga, menguruskan atau mengawalinya sama ada untuk dirinya sendiri atau sebagai ejen untuk orang lain tetapi tidak termasuk penumpang;

“pemegang gerai” ertinya berkaitan dengan sebuah pasar awam seseorang yang dilesenkan oleh Yang Dipertua untuk jualan di dalam kawasan pasar awam, dan berkaitan dengan sebuah pasar persendirian seseorang yang dibenarkan oleh pemegang lesen pasar tersebut untuk menjual di dalam kawasan pasar itu dan di dalam kedua-dua hal itu termasuklah orang yang menjaga gerai-gerai tersebut;

“pemunya”

(a) dari segi mana-mana tanah atau bangunan, ertinya pemilik tanah itu, dan jika pada pendapat Yang Dipertua pemilik tanah itu tidak boleh dikesan, orang yang pada masa itu menerima sewa premis-premis itu berkaitan dengan perkataan yang digunakan sama ada untuk dirinya sendiri atau sebagai ejen atau sebagai pemegang amanah untuk orang lain atau sebagai penerima atau yang menerimanya jika premis-premis itu disewakan kepada penyewa;

(b) dalam kes bangunan yang dibahagi-bahagikan, termasuklah perbadanan pembangunan pengurusan dan mana-mana subsidiari pemilik;

“sampah sarap kandang” ertinya tahi atau kencing kuda, lembu, kambing, babi atau lain-lain binatang ternakan dan benda-benda yang disapu atau sampah sarap dalam parit

daripada mana-mana kandang atau bangsal lembu atau tempat-tempat untuk menyimpan kambing, babi atau lain-lain binatang ternakan;

“sampah-sarap kebun” ertinya sampah-sarap dari kebun dan pekerjaan pertanian.

“sampah sarap perniagaan” ertinya sampah sarap daripada mana-mana perniagaan, pengilangan atau perniagaan atau daripada mana-mana pembinaan bangunan;

“tempat awam” termasuklah tiap-tiap jalan raya awam, lebuhraya, jalan, jambatan medan, gelanggang, lorong-lorong, kaki lima, siar kaki, perarakan, dermaga, jeti, pangkalan, sungai, anak sungai, terusan, parit tali air, taman awam atau tanah lapang dan tiap-tiap pawagam, pelbagai jenis tempat hiburan awam atau tempat-tempat kunjungan awam di mana dikenakan pembayaran untuk memasuki ke dalam atau di mana orang ramai bebas masuk;

“tempat kunjungan orang ramai” termasuklah sebuah bangunan atau suatu tempat yang tertutup yang digunakan atau dibina atau diubahsuai untuk digunakan sama ada secara biasa atau kadang-kalanya sebagai masjid, surau, gereja, kuil atau suatu tempat di mana sembahyang beramai-ramai atau upacara agama dilakukan, bukan sebuah rumah kediaman yang hanya digunakan untuk tujuan kediaman atau sebagai pawagam, panggung, dewan orang ramai, bilik sandiwara, bilik tari menari orang ramai, bilik syarahan orang ramai, atau bilik pameran orang ramai atau sebagai sebuah tempat orang ramai berhimpun yang dibenarkan masuk ke dalamnya dengan tiket atau lainnya atau digunakan atau dibina atau diubahsuai untuk digunakan sama ada secara biasa atau untuk lain-lain maksud awam;

“Yang Dipertua” ertinya orang yang pada masa itu menjalankan kewajipan-kewajipan jawatan Yang Dipertua Majlis Daerah Simpang Renggam dengan sah di sisi undang-undang dan termasuklah Timbalan Yang Dipertua

### **Kesalahan**

3. Seseorang yang-

- (a) menempatkan, menyimpan atau membuang atau menyebabkan atau membenarkan, disimpan atau dibuangkan mana-mana kekotoran di mana-mana tempat awam;
- (b) menyimpan atau meninggalkan apa-apa barang atau benda jua di tempat di mana barang atau benda itu mungkin dibawa atau terbawa ke tempat awam;
- (c) mengeringkan apa-apa bahan makanan atau apa-apa barang atau benda di atas mana-mana lebuah atau di mana-mana tempat awam kecuali di sesuatu tempat dengan sesuatu cara dan pada sesuatu masa yang ditentukan oleh Yang Dipertua;
- (d) membuang, menempatkan, menumpahkan atau menghamburkan mana-mana darah, air masin/garam, sampah sarap, cecair merbahaya atau lain-lain bahan busuk atau kotor dengan cara ianya akan mengalir atau jatuh di mana-mana tempat awam;
- (e) menitis, menumpah, membuang, menaburkan atau dengan apa-apa cara sekalipun menyebabkan dititik, ditumpah, dibuang atau ditabur, apa-apa kekotoran di mana-mana tempat awam, sama ada daripada kenderaan yang bergerak atau tidak bergerak;
- (f) mengayak, menggoncang, membersihkan, mendagun atau selainnya mengacau mana-mana kapur, abu, pasir, arang, rambut, kertas yang tidak berguna, bulu atau bahan-bahan lain dengan segera ianya dibawa atau mungkin dibawa oleh angin kepada mana-mana tempat awam;
- (g) membuang atau meninggalkan apa-apa jenis botol, kaca, tin, bekas makanan, pembalut makanan, sisa makanan atau mana-mana benda atau barang-barang lain di mana-mana tempat awam;
- (h) menyebabkan, mengakibatkan atau membiarkan air dari mana-mana tempat mencuci pinggan mangkuk atau parit atau apa-apa bahan cecair lain yang

merbahaya kepunyaannya atau premisnya, dialirkan, dicurahkan atau dibuang atau ditumpahkan atau diletakkan atas mana-mana lebu;h;

- (i) menyebabkan, mengakibatkan atau membiarkan mana-mana bahan yang merbahaya daripada mana-mana pembentungan, tandas atau limbah dialirkan, disalurkan atau dibuangkan atau ditumpahkan ke dalam parit;
- (j) semasa kerja pembinaan, pengubahan atau peruntuhan, mana-mana bangunan atau binaan atau pada bila-bila masa melonggokkan, menjatuhkan, meninggalkan atau menempatkan atau menyebabkan dilonggokkan, dijatuhkan, ditinggalkan atau ditempatkan di dalam atau ke atas mana-mana tempat awam apa-apa batu, simen, tanah, pasir, kayu atau bahan-bahan pembinaan, benda atau bahan-bahan lain atau gagal untuk mengambil langkah keselamatan yang sesuai untuk mengelakkan bahaya kepada nyawa, kesihatan atau untuk kepentingan orang ramai yang menggunakan mana-mana tempat awam daripada habuk yang berterbangan atau sisa atau serpihan yang jatuh atau apa-apa benda lain;
- (k) membuang, menyebabkan, mengakibatkan atau membiarkan pembuangan air di atas mana-mana tempat awam daripada mana-mana lopak, parit, pembetung, saluran air di kaki-kaki atap, tandas limbah atau pancutan air adalah;

melakukan suatu kesalahan.

#### **Anggapan kepada pesalah**

4. (1) Jika dalam mana-mana hal dibuktikan bahawa apa-apa habuk atau benda lain yang disebutkan terdahulu daripada ini diletakkan di mana-mana tempat daripada mana-mana bangunan atau tanah atau bahawa apa-apa air atau apa-apa bahan-bahan busuk telah mengalir atau disalurkan atau dibuangkan atau diletakkan di atas atau di dalam mana-mana lebu;h atau parit bertentangan dengan undang-undang kecil ini, maka hendaklah dianggap bahawa kesalahan itu telah dilakukan oleh, atau dengan kebenaran penghuni bangunan atau tanah tersebut.

- (2) Bagi maksud perenggan (e) undang-undang kecil 3-
- (a) di mana bahan atau benda kekotoran itu dijatuhkan, ditumpahkan atau ditaburkan dari sesebuah kenderaan atau jatuh atau tumpah daripadanya pemandu atau orang yang bertanggungjawab atau mengawal kenderaan itu adalah dianggap telah melakukan kesalahan itu kecuali kesalahan itu dilakukan oleh seseorang yang lain daripada pemandu atau orang yang bertanggungjawab atau mengawal kenderaan tersebut dan identiti orang yang melakukan kesalahan itu dapat disahkan; dan
  - (b) di mana seseorang pemandu kenderaan bermotor atau lain-lain jenis kenderaan dituduh atau disyaki bersalah atas satu kesalahan-
    - (i) tuan punya kenderaan tersebut hendaklah memberi maklumat sebagaimana yang dikehendaki oleh seorang pegawai polis atau pegawai Majlis Daerah Simpang Renggam yang telah diberi kuasa di bawah peruntukan undang-undang kecil 5, mengenai diri serta alamat orang yang memandu kenderaan tersebut atau di mana atau mengenai masa kesalahan atau dilakukan serta lain-lain maklumat yang diperlukan oleh pegawai polis atau pegawai awam tersebut. Dan jika tuan punya kenderaan itu gagal berbuat demikian dalam tempoh tujuh hari daripada tarikh maklumat itu dikehendaki daripadanya, dia adalah telah melakukan kesalahan di bawah Undang-undang Kecil ini melainkan dia membuktikan dengan memuaskan kepada Mahkamah bahawa beliau tidak tahu atau tidak dapat memastikan dengan memuaskan maklumat yang dikehendaki.

- (ii) sesiapa sahaja yang sepatutnya bertanggungjawab atau mengawal kenderaan bermotor tersebut hendaklah, jika dikehendaki memberi maklumat sebagaimana tersebut di atas dalam bidang kuasanya yang boleh menyebabkan mengenal pasti pemandu kenderaan tersebut dan jika dalam masa tujuh hari dari tarikh maklumat itu dikehendaki daripadanya ia gagal berbuat demikian, dengan ini dia adalah telah melakukan suatu kesalahan di bawah undang-undang kecil ini.

### **Kuasa untuk menangkap**

5. (1) Walau apa pun peruntukan mana-mana undang-undang lain yang sedang berkuat kuasa, mana-mana pegawai polis atau pegawai Majlis Daerah Simpang Renggam yang telah diberikan kuasa secara bertulis oleh Yang Dipertua, dalam keadaan biasa atau dalam mana-mana kes tertentu boleh menangkap seseorang yang pada pendapat atau sesiapa yang dia mempunyai sebab untuk mempercayai telah melakukan, kesalahan di bawah undang-undang kecil ini;

- (a) jika nama serta alamat orang itu tidak diketahui;
- (b) jika orang itu enggan memberi nama dan alamatnya; atau
- (c) jika ada sebab yang munasabah untuk meragui kebenaran tentang nama dan alamat yang telah diberikan.

(2) seseorang yang ditangkap di bawah undang-undang kecil ini boleh ditahan sehingga nama serta alamatnya dapat benar-benar dipastikan, dengan syarat seseorang yang ditangkap itu tidak di tahan melebihi masa yang sepatutnya dia dihadapkan ke Mahkamah dan perintah Mahkamah untuk penahanannya diperolehi.

### **Kuasa menahan kenderaan untuk pemeriksaan**

6. (a) Jika mana-mana pegawai diberi kuasa oleh Yang Dipertua mempunyai sebab bagi mempercayai bahawa kesalahan di bawah Undang-undang Kecil 3(e) telah



dilakukan bagi mana-mana kenderaan bermotor, dia boleh menghendaki kenderaan itu diberhentikan dan boleh menghendaki pemandu kenderaan itu memandunya ke tempat lain, dan kenderaan itu boleh, jika perlu, ditahan bagi maksud pemeriksaan. Dengan syarat bahawa tiada kenderaan motor boleh ditahan di bawah Undang-undang Kecil ini bagi suatu tempoh yang lebih dari empat puluh lapan jam.

(b) Mana-mana orang yang memandu suatu kenderaan motor di jalan hendaklah memberhentikan kenderaan motor itu apabila dikehendaki sedemikian oleh pegawai Majlis yang berkuasa dan jika dia gagal membuat demikian maka dia adalah melakukan suatu kesalahan.

### **Membersihkan kotoran**

7. (1) Majlis boleh dengan notis bertulis memerintahkan mana-mana orang yang melakukan kesalahan di bawah mana-mana peruntukan Undang-undang Kecil 3 itu supaya kekotoran itu dibersihkan dengan apa-apa cara dan dalam tempoh tertentu.

(2) Majlis boleh sendiri melalui pegawai yang diberi kuasa atau di kontrak kepada orang lain atau dengan apa-apa cara membersihkan kekotoran itu dan boleh menuntut apa-apa belanja bagi melaksanakan kerja itu daripada orang yang melakukan kesalahan.

(3) Majlis hendaklah memperakui belanja bagi melaksanakan kerja itu kepada orang yang melakukan kesalahan itu dan perakuan itu adalah bukti muktamad mengenai jumlah wang yang kena dibayar itu.

(4) Seseorang yang tidak mematuhi notis yang diberikan dibawa Undang-Undang kecil (1) di atas adalah melakukan suatu kesalahan dan boleh dikenakan denda tidak lebih daripada dua ratus lima puluh ringgit bagi tiap-tiap satu hari kesalahan itu berterusan.

### **Halangan sebagai satu kesalahan**

8. (1) seseorang yang –

- (a) membina, mendirikan, membangunkan atau menyelenggarakan atau membenarkan supaya dibina, didirikan atau dibangunkan atau diselenggarakan mana-mana tembok pagar, rel, tiang atau timbunan apa-apa bahan lain atau halangan lain di mana-mana tempat awam;
- (b) tanpa kebenaran Majlis menutup atau menghalang mana-mana parit terbuka, pemetang atau akuaduk di sepanjang tepi mana-mana lebuhraya;
- (c) melonggok atau menyebabkan di longgok apa-apa kotak, bale atau bungkusan barang-barang perdagangan, perkakas, pinggan mangkuk atau bahan-bahan lain atau benda-benda lain di mana-mana tempat-tempat awam selama lebih daripada masa yang diperlukan bagi memuatkan atau memunggah barang-barang tersebut;
- (d) melonggok, meletak, menggantung atau menyebabkan di longgok, diletak atau digantung apa-apa barangan atau benda-benda yang digunakan untuk atau berkaitan dengan perdagangannya di tempat-tempat awam;
- (e) melonggok, meletak, menggantung atau menyebabkan di longgok, diletak atau digantung kayu, balak, besi buruk, kenderaan yang terbiar atau mana-mana bahagiannya bahan buangan atau benda-benda lain atau barang-barang lain di tempat-tempat awam;
- (f) menyimpan atau menyebabkan disimpan sampah sarap halaman, sampah sarap dapur atau sampah sarap perniagaan atau apa-apa benda atau barang-barang lain di tempat-tempat awam; atau
- (g) menyebabkan atau membenarkan mana-mana kenderaan diletakkan di mana-mana siar kaki, lorong belakang, lorong tepi, kaki lima, bahu jalan atau mana-mana tempat awam.

adalah melakukan suatu kesalahan.

(2) jika didapati di dalam mana-mana kes bahawa apa-apa barang atau benda dilonggokkan di mana-mana tempat awam daripada mana-mana bangunan atau tanah bertentangan dengan undang-undang kecil ini maka hendaklah dianggap bahawa kesalahan itu telah dilakukan oleh atau dengan kebenaran penghuni bangunan atau tanah tersebut.

### **Kuasa untuk memindahkan halangan**

9. (a) Yang Dipertua atau mana-mana pegawai Majlis yang diberi kuasa oleh Majlis boleh mengunci kenderaan atau mengalihkan atau menyebabkan mana-mana halangan itu dialihkan ke suatu tempat yang sesuai dan di tinggalkan pada mana-mana tempat di atas risiko pemunya dan orang yang melakukan kesalahan itu dan boleh ditahan barang berkenaan sehingga perbelanjaan pemindahan dan penahanannya dibayar.

(b) Majlis hendaklah mengesahkan perbelanjaan tersebut kepada pemunya atau orang yang melakukan kesalahan itu pengesahan Majlis itu adalah bukti yang muktamad atas jumlah yang kena dibayar.

(c) Jumlah tersebut hendaklah dianggap sebagai hutang kepada Majlis Daerah Simpang Renggam.

(d) Apa-apa barang atau benda yang tidak tahan lama boleh dilupuskan pada bila-bila masa mengikut cara yang ditentukan oleh Yang Dipertua.

(e) Jika setelah tempoh tujuh hari daripada tarikh pemindahan, perbelanjaan pemindahan dan penahanannya tidak dibayar, barang atau benda yang telah dipindahkan akan dijual secara lelong raya atau dengan cara lain yang diarahkan oleh Majlis.

(f) Pendapatan jualan, ditolak perbelanjaan, hendaklah, jika dituntut, dibayar kepada pemilik barang atau benda yang telah dipindahkan itu, tapi jika pendapatan itu tidak dituntut dalam masa tiga bulan dari jualan, ianya akan menjadi harta Majlis Daerah Simpang Renggam

### **Pembinaan sementara pada masa perayaan dan lain-lain**

10. Tiada apa pun yang diperuntukkan di dalam undang-undang kecil ini boleh menahan Majlis membenarkan mana-mana pembinaan sementara di mana-mana tempat awam pada masa perayaan-perayaan dan istiadat-istiadat.

#### **Kuasa untuk merantai dan mengunci**

11. (a) Apabila sesebuah kenderaan motor diletak dengan melanggar mana-mana daripada peruntukan undang-undang kecil ini maka sesiapa yang diberi kuasa bagi maksud itu oleh Yang Dipertua bolehlah menahan kenderaan itu daripada bergerak dengan merantai dan menguncinya dengan menggunakan alat yang difikirkan patut oleh Yang Dipertua dan tidaklah boleh sesiapa pun mengalih kenderaan motor itu atau mengganggu rantai dan kunci itu. Atas permintaan dan dengan syarat tuan punya atau orang yang menjaga kenderaan motor itu membayar kepada Yang Dipertua suatu bayaran tidak lebih daripada lima ratus ringgit Yang Dipertua atau mana-mana pegawai yang diberi kuasa boleh menanggalkan rantai dan kunci dan melepaskan kereta tersebut.

(b) Yang Dipertua tidak bertanggungjawab atas apa-apa kerosakan yang berlaku atas kenderaan motor itu dalam masa dan ketika dirantai, dikunci atau ditahan.

#### **Penalti**

12. Sesiapa yang melanggar mana-mana undang-undang kecil itu atau mana-mana peraturan atau syarat di bawahnya hendaklah apabila disabitkan kesalahannya itu dikenakan denda tidak melebihi dua ribu ringgit atau penjara tidak melebihi setahun atau kedua-duanyanya dan mengenai kesalahan yang berterusan denda sebanyak tidak lebih daripada dua ratus ringgit bagi tiap-tiap hari selama kesalahan itu berterusan setelah disabitkan.

#### **Kuasa mengkompaun**

13. (a) Mana-mana kesalahan di bawah Undang-undang Kecil ini boleh di kompaun mengikut kaedah yang ditetapkan di bawah Undang-undang Kecil Mengkompaun Kesalahan - Kesalahan Kerajaan Tempatan (Majlis Daerah Simpang Renggam) 2011.

(b) Sesuatu notis tawaran kompaun adalah disifatkan sebagai telah disampaikan kepada pemandu atau pemunya kenderaan bermotor yang berkaitan oleh pegawai yang

diberi kuasa oleh Majlis jika ianya telah diletakkan di cermin hadapan kenderaan bermotor tersebut atau di mana-mana bahagian lain kenderaan bermotor tersebut yang mudah dilihat.

#### **Tanggungjawab pemunya berdaftar**

14. Dalam hal mengenai pelanggaran atau tidak mematuhi mana-mana peruntukan Undang-undang Kecil ini pemunya berdaftar kenderaan itu hendaklah dianggap sebagai telah melakukan kesalahan jika orang yang sebenarnya melakukan kesalahan itu tidak diketahui atau tidak dijumpai.

#### **Pemansuhan, kecualian dan peralihan**

15. (1) Tertakluk kepada perenggan (2) apabila Undang-undang Kecil ini mula berkuat kuasa, Undang-undang Kecil Mencegah Kekotoran (Majlis Daerah Kluang Selatan) 1982 yang telah diwartakan melalui J.P.U. 106 Tahun 1982 (selepas ini disebut Undang-undang Kecil termansuh) hendaklah terhenti berkuat kuasa dan hendaklah disifatkan telah dimansuhkan.

(2) Walau apapun perenggan (1)-

(a) tiada apa-apa jua yang terkandung dalam Undang-undang Kecil ini boleh menghalang mana-mana orang daripada didakwa atau dihukum di bawah Undang-undang Kecil termansuh bagi apa-apa kesalahan yang dilakukan di bawah Undang-undang Kecil termansuh sebelum mula berkuat kuasanya Undang-undang kecil ini;

(b) apa-apa prosiding di bawah Undang-undang Kecil termansuh yang belum diputuskan sebelum mula berkuat kuasa Undang-undang Kecil ini hendaklah diterangkan di bawah Undang-undang Kecil termansuh seolah-olah Undang-undang Kecil ini tidak dibuat;

(c) apa-apa lesen yang telah dikeluarkan di bawah Undang-undang Kecil termansuh hendaklah terus berkuat kuasa dan mempunyai kuat

kuasa sehingga tamat tempoh baginya ia telah diberikan tetapi ia hendaklah tertakluk kepada peruntukan-peruntukan Undang-undang Kecil ini dan mana-mana peraturan dan boleh dibatalkan di bawah dan mengikut Undang-undang Kecil ini; dan

(d) apa-apa perlantikan atau penguatkuasaan yang dibuat di bawah Undang-undang Kecil termansuh hendaklah berkuat kuasa dan mempunyai kuat kuasa seolah-olah ia telah dibuat di bawah Undang-undang Kecil ini, sehinggalah perlantikan atau penguatkuasaan itu dibatalkan atau disatukan di bawah Undang-undang Kecil ini.

Diperbuat pada : 30 Jun 2011

[MDSR/UNDG/01(A)(XVIII).Jld.1]

**HAJI ABDUL KARIM BIN ABU BAKAR**  
*Yang Dipertua*  
*Majlis Daerah Simpang Renggam*

Disahkan pada :

[PUNJ. Bil.(PU2) 7 Jilid 4(8)]

**HAJI MOHD HALIM BIN HASBULLAH**  
*Jurutulis Majlis Mesyuarat Kerajaan*  
*Johor*